



Rabu, 21 Pebruari 2024

Ogen : Jop 2:11-13



Jadi Pengapul



Elipas, Bildat ras Sopar e me kandu-kande Jop. Tading i kuta si pelain-lain. Kenca ibegina berita kegeluhen Jop si sangana dem i bas perbeben (anakna mate, ertana lesap janah daging kulana lit i bas pinakiten) minter ipersadana arihna guna ndahi ras ngapuli Jop. Kenca idahna Jop kepate kel ia, tangis dengen icaingkenna uisna tandana atena seh cedana. Pitu wari pitu berngi la ia ngerana lanai lit belas-belasna sabap lanai siat ukurna natap temanna Jop i bas perbeben si mberat. Enda me perbahnen teman-teman Jop. Kepete kel ia ngidah kai si jadi man Jop. Kesusahen Jop igejapkenna jadi kesusahenna, suina e jadi suina ras-ras. Perbahnen enda ncidahkan perbahnen si dem i bas kekelengen. Kekelengen bage pe pertemanen Jop ras teman-temanna labo terjeng paksa keriahen saja. Kekelengen si mbagesna e icidakhenna arah mereken diri jadi teman sejawat Jop i bas paksa kesusahen. Perbahnen-perbahnen e tahu jadi pengapul, si banci mereken gegeh rikut ras arapen si mbaru nandangi Jop. Labo itenahkan Jop ia, tapi ipersadana arihna guna ndahi Jop. Nulih kita ku bas kegeluhen si genduari, tentuna melala kel nge temanta. Janah kita pe jadi teman man kalak sideban. Umbanlah kai silakoken Elipas, Bildat, ras Sopar enda. Kune lit sibegi berita entah sieteh maka lit temanta sangana latih akapna ertangkel subuk erkiteken masalah ekonomi, anak-anak/jabu, bage pe pinakit si lit i bas dading kula, berekenlah dirinta guna jadi pengapul man bana. Dahi, telponi, totoken, pergegehi ia segelah la kel si sada akapna ia maba baban si mberat e. Maya Angelow ngataken "*cobalah menjadi pelangi di awan orang lain*". Benteha (pelangi) mereken arapen kegeluhen si mejile kap. Bagelah kita sebage moria, bahanlah geluhta enda mereken warna, arapen man kalak sideban seh maka tergejap tahu kekelengen e i bas kegeluhen.

☞ "*Terapul dengen megegehlah kalak sideban arah kerehenta*"



